

01 破病有夠艱苦的

洪素琴

我讀幼稚園的時陣，有夠歹育飼，身體荏甲磕袂著就呿呿嗽、發燒、頭殼疼，啥物款的感冒對我來講，攞袂生份，行醫生館親像咧行灶跤咧。

會記得半年前，有一工放學我行到半路煞烏天暗地，一目瞞仔透大風、落大雨，欲覘都袂赴，規身軀淋甲澹糊糊。轉去到厝，規個人必必掣，害矣！我閣感著矣。規身軀軟菼菼，袂輸去予別人霸占去全款，毋但嗽甲五臟六腑強欲吐吐出來，頭殼嘛疼甲強欲必開。我干焦感覺眼前烏赳赳，敢若去到另外一个世界全款。

半暝仔睏醒，目睷擘金。欸！這是啥物所在？眼前所看著的：白色的眠床、白色的被單……，阿母閣覆佇眠床邊，我的手插一枝射針，原來我閣來病院報到矣。

想著家己日時佇運動埕猶閣活跳跳，佻同學咧拍球、走相逐，這聲煞袂振袂動，欲迤迤、欲耍手機仔攞無氣力。我佇病院蹣幾若工，頭一兩工我瘦骨輪，疼骨節，艱苦甲毋成食、毋成睏，規個人消瘦落肉。

有一工阿母接著一通電話，共我講伊欲去公司一逝，連鞭就轉來。伊干焦離開一點鐘爾爾，我佇這點鐘內底，瘁响夯起來，規個人喘甲誠艱苦，若像去予大粒石頭砦牢

牢咧全款，我欲哭無目屎、欲吼無路來。若輪著阿爸來共我照顧的時，伊會講故事、講笑談，我定定予伊弄甲一直笑。伊講的故事佻笑談會當治枵兼治病，予我煞袂記得家己是病人。

我佇病院精神的時，定定會聽著半暝仔有病人咧哀爸叫母，若像去予人凌治全款。不時會看著一寡老歲仔人，規肢手烏青兼凝血，親像去予人苦毒全款，有夠淒慘的！看著遮濟可憐代，雄雄感覺家己的病無算啥物，家己愛堅強起來。

每擺我若破病，阿爸、阿母就愛共公司請假，照輪來病院共我照顧。親情五十不時來病院共我看，希望我會當較早出院。雖然破病的時陣有足濟人來共我關心，予我感覺真溫暖，毋過破病的滋味真正無蓋好，閣愛麻煩遐爾濟人，我想猶是莫破病算較會和啦！